



KENYATAAN MEDIA

Dua Kematian Akibat Banjir: KPWKM Seru Rakyat Utamakan Keselamatan

Saya dan seluruh warga Kementerian Pembangunan Wanita, Keluarga dan Masyarakat (KPWKM) menzahirkan dukacita terhadap dua kes kematian akibat banjir yang direkodkan di Kelantan, masing-masing di Gua Musang pada 21 November 2025 dan di Tanah Merah pada 26 November 2025. Takziah kepada keluarga mangsa, dan semoga mereka diberi kekuatan menghadapi detik yang amat sukar ini.

Setakat 28 November 2025, banjir di seluruh negara kekal serius dengan 242 PPS beroperasi, melibatkan 9,033 keluarga dan 27,489 mangsa. Amaran cuaca yang dikeluarkan MET Malaysia pada 27 November 2025, jam 10 malam, menunjukkan hujan sangat lebat dan berterusan dijangka berlaku di beberapa negeri termasuk Terengganu, Pahang, Selangor, Putrajaya dan Negeri Sembilan. Beberapa negeri lain seperti Perak, Pulau Pinang, Kedah, Kelantan dan Johor turut berada pada tahap amaran buruk dan waspada. Keadaan ini boleh meningkatkan risiko banjir kilat, limpahan sungai dan tanah runtuh, terutama di kawasan rendah.

Sebagai langkah kesiapsiagaan, Jabatan Kebajikan Masyarakat (JKM) telah digerakkan sejak awal bersama kerajaan negeri dan agensi bencana lain. JKJ juga bersedia mengaktifkan PPS tambahan pada bila-bila masa sekiranya keadaan cuaca bertambah buruk. Bekalan makanan, selimut dan keperluan asas berada pada paras mencukupi dan akan terus diagihkan mengikut keperluan mangsa di lapangan.

KPWKM menyeru semua penduduk di kawasan berisiko agar sentiasa berwaspada, mengikuti arahan pihak berkuasa dan segera berpindah ke PPS jika diarahkan. Utamakan keselamatan ahli keluarga, khususnya kanak-kanak, warga emas dan golongan OKU, serta elakkan berada berhampiran sungai, kawasan rendah dan lokasi yang mudah dinaiki air. Mereka yang memerlukan bantuan boleh mendapatkan sokongan di PPS terdekat atau menghubungi saluran kecemasan yang rasmi.

Kita kini berdepan fasa cuaca yang mencabar, dan keselamatan rakyat adalah keutamaan. KPWKM melalui JKJ akan terus memantau keadaan dari semasa ke semasa serta memastikan setiap keluarga terkesan menerima bantuan secepat mungkin dan dengan penuh empati.

NANCY SHUKRI

MENTERI PEMBANGUNAN WANITA, KELUARGA DAN MASYARAKAT

28 November 2025